

Date – 27/04/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Nakin lawk dar 8 atanga Aizawl Municipal Corporation (AMC) inthlanna a vote tlate chhiar tan turin engkim peih fel a ni tawh.
2. Mizoram mi Israel hnam bo ni nia inchhal mi 240 chuangte chu Israel ramahan pem.
3. Lawngtlai district Sabualtlang khaw pa pakhat chu savawmin a seh avangin hliam na tak a tuar
4. Bangalore Mizo Association chuan Bangalore-a hnathawh tur hria ni a insawi thin social media aṅanga hna zuarte lakah fimkhur turin Mizo mipuite an chah.

<><><>

AMC VOTE COUNTING

Nakin lawk dar 8 atanga Aizawl Municipal Corporation (AMC) inthlanna a vote tlate chhiar tan turin engkim peih fel a ni tawh.

State Election Commissioner Dr. H. Lalthlangliana'n Akashvani News Aizawl a hrilh danin April ni 21-a AMC ward 19-a inthlanna a vote tlate bakah mahni in luma vote thlakte leh inthlanna a duty-te vote thlak hi a vaiin Aizawl Bawrhsap Pisapui-ah chhiar a ni dawn a. Counting Hall 4-ah vote hi chhiar a ni ang a. Counting Hall 2-ah vote chhiarna dawhkan 10 ve ve awmin Counting Hall 2 dangah vote chhiarna dawhkan 8 ve ve a awm bawk ang. Vote chhiartu tur (counting official) zawng zawng chu vote an chhiarna hmunah zing dar 7 a thleng vek tura hriattir an ni a. Dar 8-ah vote chhiar tanin, upa, rualban lo leh hrisel lohna avanga mahni in luma vote thlak mi 2,594-te leh inthlan duty avanga inthlan vote thlak ni hma a vote lo thlak tawh mi 1,328 te vote chhiar hmasak a ni ang . Chumi zawhah electronic voting machine (EVM) a vote tla nuai 1, sing 5 leh 640 te chhiar zui nghal a ni ang. Dr. H. Lalthlangliana chuan vote chhiarna hmunah hian venhimna khauh taka kenkawh a nih thu a sawi a. Vote chhiartu turte chu hmanhmawh lova, felfai leh sawisel tur awm lova an hna hlen chhuak tura hrilh an nih thu a sawi bawk.

AMC inthlanna-a candidate 68-te dinhmun chu vawiin vote chhiar zawh hian tihchian a ni dawn ta a. Puan tawh thin angin AMC inthlan hi rorel lai ZPM, bakah

MNF leh MPCC te chuan bial 19 an chuh kim vek a. BJP chuan bial 11-ah candidate an nei a. Independent candidate an awm lova. AMC bial/ward 19 zinga 6 chu hmeichhe tan chauha chuh theih tura ruat ni mah se, tu pawhin a chuh theih bialah hmeichhe candidate 7 an awm a. Tun tum AMC inthlan chuhtu mi 68 zinga 28 te chu hmeichhia niin, INC leh ZPM-ah hmeichhe candidate 9 ve ve, MNF-ah 7 leh BJP-ah 3 an awm a ni.

<><><>

SPORTS MINISTER

Sports Minister Pu Lalnghinglova Hmar chuan Olympic 2036 thlir chung a hmalakna chuan sports discipline zawng zawng a huam thei dawn lo tih sawiin Olympic medal beiseiawmna discipline te thlur binga duat bik an ngai tih a sawi.

India rama Sports Minister te inkhawmpui, ‘Chintan Shivir of Ministers of Youth Affairs and Sports of States/UTs’ chu nimin leh vawiina Srinagar-a Sher-i-Kashmir International Conference Centre (SKICC) a hmanah he thu hi Sports Minister chuan a sawi a. Indian sports kalphung inthlak mek chu lawmawm a tih thu sawiin India ram chu a kal dan ngai renga a kal chuan result pawh a ngai reng dawn tih a sawi a, hmasawn tur chuan thlak ngai a awm thin a ti. Sports Minister chuan Sports Authority of India siam that tul a tih sawiin Delhi atanga thutlukna siam mai loin state hrang hranga sports official leh association te zin chilh thin turin sawrkar laipua sports hotute a sawm bawk a ni.

Sports Minister chuan Olympic Games 2036 hmathlir nei chungin kum 2024 ah Mizoram Sports Conclave buatsaih a nih thu leh, Bana Kaih ‘Empowering Mizoram Sports’ hnuaiyah naupang kum 8 atanga kum 15 inkar tan state pum huapa coaching kalpui mek a nih thu a sawi a. School Education Department nen tangkawpin ‘Grassroot Sports Development Programme’ hnuaiyah school naupangte sports coaching pek an nih thu sawiin, age group inelnaa kum dik lo awm thin tibo tura Mizoramin hma a lak thu a sawi bawk a ni. Union Sports Minister Dr. Mansukh Mandaviya pawhin India rama sports tihhmasawn kawngah state ten mawhphurhna sang tak an nei tih a sawi a. Kum 10 chhunga sports powerhouse ni turin ruahmanna an siam tih sawiin an ruahmanna chu lehkhapuanah chauh ni lo, district tina infiamna hmunah te a taka langchhuak tur a nih thu a sawi bawk a ni.

<><><>

MIZO JEWS

Mizoram mi Israel hnam bo ni nia inchhal mi 240 chuangte chuan Zirtawpni zing dar 12 leh a chanve vel khan Tel Aviv-a Ben Gurion tumhmun an thleng.

‘Mizo Juda’ ti a sawi, anmahni chuan ‘Bnei Menashe’ tia insawite hi Mizoram leh Manipur atangin mi 300 ve ve kumina Israel a pem thawh khatna-a pem thla tur an nih laiin hriselna leh harsatna dang vangte, passport fel loh vangte-in Mizoram atang hian mi 240 vel chauh an thleng thla thei a. Mi tlem te chu Delhi-ah la cham bangin tunkar chho hian Israel an thlen thlak ve theih beisei a ni a. Manipur atanga pem thla turte pawh an chhuk ve theih thuai beisei a nih thu pem thla zing ami pakhat chuan a sawi. Israel a pem thla turte thlang tur hian nikum December ni 1 leh ni 10 inkar khan Israel atanga lokal Juda puithiam (Rabbi) 9 leh Jewish Agency for Israel bakah Delhi a Israel Embassy atangin mi thahnem tak an lokal a. February thla emaw March thla emaw a pem thlak inbeisei tawh kha West Asia indona a chhuah tak avangin an khawtlai ta a ni.

Israel leilung an zu rah hian Israel Immigration Minister leh official-te chuan airport-ah mi tharte hi an lo hmuak a, Bnei Menashe community Israel an thleng chu

an ram chanchina thil chhinchhiah tlak tak a nih thu Israel Immigration Minister chuan a sawi. An zinga tel ve Aizawl ami pakhatin Akashvani News a hrilh danin an thlen rual rual hian Israel khua leh tui nihna leh hnathawh phalna an lo pe nghal niin a sawi a. Nazareth velah an awm dawn niin a sawi a ni.

Nikum November khan Mizoram leh Manipur a Israel hnam bo ni a inngai mi 6,000 thelh kum 2030 ral hma ngei a Israel rama hruai thla tur hian Israel sorkar chuan thutlukna a lo siam tawh a. Kumin hian thawh hniha kalin mi 1,200 bawr vel hruai thla turin ruahmanna siam a ni a. Hemi tana senso tur ruahmanna pawh Israel sorkar chuan a lo remti tawh a. Ram Thianghlim a hnambote hruai thlak buaipuitu Shavei Israel pawl chuan tun dinhmunah Manipur leh Mizoram mi 4,000 vel Israel-ah an pem thla tawh niin an sawi a ni.

<><><>

MALARIA

Mizoramah sikserh (malaria) natna a hluar a, India rama sikserh tamna ber state a ni mek.

Mizoramah Malaria natna a la hluar hle a, tun dinhmunah India ramah mi sang khat zel atanga malaria vei hmuhchhuah zat (Annual Parasite Incidence-API) atanga chhutin Malaria tamna ber state nihna a hauh mek zel niin National Vector Borne Disease Control Programme (NVBDCP) hotute sian an sawi a. Mizoramah kum 2024 khan Malaria vei mi 16,899 awmin, mi 7 in nunna an chan a. Kum 2025 ah Malaria natna vei mi 9,328 an awm a, nunna chan mi 6 an awm bawk a ni. Kumin 2026 Jan-March thla chhungin Malaria hmuhchhuah tawh zat hi 666 niin nunna chan an awm lo.

Nimin kha World Malaria Day a ni a. He ni denchhen hian Mizorama District zawng zawngah Malaria dona atana hmalakna hrang hrang kalpui niin, khawtlang mipui leh Pawl hrang hrang te nen Malaria chungchang inzirtirna hun te buatsaig a nih bakah Source Reduction Drive (Thosi pian theihna tui tling tihbo hnatlang) te, Lo/Huan neitu te Malaria laka an lo him theih na'na hmalakna chi hrang hrangte bakah school zirlai te nen hun hmanho a ni bawk a ni. Heng bakah hian Malaria tamna District a Sumo leh HMV ah te Malaria Poster tar a ni bawk.

<><><>

BEAR ATTACK

Lawngtlai district Sabualtlang khuaa khawsa mek Pu Roby Chondro kum 41 chu Inrinni khan an lo a a feh tur savawmin a bei a, hliam na tak tuarin damdawi-inah enkawl a ni.

Sabualtlang hi Lawngtlai atanga km 120 vela hla, Myanmar ramri dep a awm a ni a, Bru hlang awmna khua a ni. Kuminah hian an khua atanga Myanmar lam hnaih km 5 vela hla ah lo an nei a. Inrinni zing dar 5 vel khan Pu Roby Chondro hi an lo a feh turin amahin a kal a, khua atanga km 4 vel a kal tawh ang tihah kawng chhak atangin savawm in a lo bei chiam mai a. Pu Roby Chondro hian a chem ken nen theih tawpa lo beiletin, Savawm hian a hmai leh a taksa hmun hrang hrangah a ham sak a. Nikhua a hriat loh hnuah Savawm hi a inthiarfihlim ta a ni. Pu Roby Chondro nikhawhrela a kawnga lo awm chu a hnunga feh tura kal mi pathum te'n hmu in khua amite an phone nghal a. Sabualtlang VCP Pu Zama Chondro chuan a Gypsy thawh chhuahpuin, Roby Chondro chu Lawngtlai lam panpui nghal a ni a,

Inrinni chawhma dar 11 vel khan LCMC thlenpui a ni a. Damdawin a thawktute hian a nunna atana hlauhthawnawm lutuk a nih loh thu an sawi.

Pu Roby Chondro lu hi hmun tamtakah an thui a, Khawl hmanga an enfiahna ah a luruh hi a khi niin an sawi a, A taksa hmun dangah pawh hliam a tam hle a. Pu Roby Chondro awmpuitu a nau Dunirang chuan Savawm hi a kawlh hle a, a No hruai lai ni ngeia an rin thu a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

FMD

Myanmar rama ran natna/pulhri a len avangin Lawngtlai district bawrsap chuan Myanmar atanga bawng leh lawi lakluh a khap.

Lawngtlai district bawrsap Pu Donny Lalruatsanga chuan Lawngtlai district thenawm ram Myanmar ah bawng/lawi pul hri a leng mek nia thu dawn a nih avangin Lawngtlai District chhunga ran vulhte a lo him zawk theih nan, ramdang atanga Bawng leh Lawi lakluh khap tula hriat a ni, a ti a. Hemi avang hian Myanmar atangin Lawngtlai District chhungah Bawng leh Lawi lakluh/phurhluh khap tlat a nih thu thupek a chhuah a ni. Myanmar a bawng leh lawi pulhri leng hi Foot and Mouth Disease ni ngei a hriat a ni.

Bawrsap thupek hian Lawngtlai District pum a huam ang a, thu leh awm hma chu tihchhuah a nih atanga thla hnih chung a huam ang.

Lawi leh Bawng pulhri chungchangah hian Lawngtlai a kan Corr zawhna chhangin District Veterinary Officer Dr. Charlie C. Chawngthu chuan he ran natna hi China lam atanga rawnlut, Myanmar a darh ta ni a an hriatthu a sawi a. Bawng leh lawi te chu an ke leh an ka chung a na a, Foot and Mouth Disease ti a hriat niin, tuntuma he natna hri leng mek hi a hma lama hetiang natna hri leng nen inang viau mahse, a venna damdawi erawh a hran a ngai niin a sawi a. DVO chuan he natna a darh loh na'n a bikin Ran hmanga sumdawngte District Magistrate thupek tha taka zawm turin a chah a ni.

<><><>

BANGALORE MA

Bangalore Mizo Association chuan Bangalore-a hnathawh tur hria ni a insawi thin social media atanga hna zuarte lakah fimkhur turin Mizo mipuite an chah.

Bangalore Mizo Association chuan thuchhuah siamin Bangalore a hnathawh tum te chu an thawhna company/dawr aṅanga thawk tura inremna lehkha bakah appointment letter lak a pawimawh thu an sawi a. Ral khat atanga hnathawhna tur inhmuhsak chungchangah, a hmun te, hlawh zat te, a him leh him loh te hmuh a hriat hmasak loh chuan thutlukna siam mai loh a him thu an sawi a. Hnathawh tum te chu damlohna tawk thei an nih avangin A bikin unorganized sector a thawkten health insurance emaw medical insurance engemaw tal neih ngei ngei a pawimawh tih an sawi a ni.

Hemi rual hian Bangalore-a zirna chhonzawm tum te tana hriattur pawh tarlangin Zirna tur college/institution te dinhmun leh a awmna te hriatchian hmasak a pawimawh thu an sawi a. Zirna tur fee te midang kaltlanga pek hmain an fee zat hriat chian hmasak a pawimawh tih sawiin fee lo ei thensak ching Agent/broker an awm theih avangin chutiang mite an tawn loh nan fimkhur turin zirlaite an chah a. Bangalore khawpuia In luah tur te chu in neitute nena inbiakremna chi hrang hrang paper-a ziaka hming ziaak thlapa neih a ngaih thu an sawi a. Hnamdang in luah an nih angin, an awmdan leh khawsak danah te, inleng neih kawngah te, ei leh in thilah te, in neitute duhdan zahsak a pawimawh tih sawiin Mizo hming ti chhe thei tura khawsa lo turin an ngen tih an sawi bawk a ni.

<><><>